



14. august 2017

UPA 2017/120

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq saqqummiuppara:

Naalagaaffiit Peqatigiit Nunarsuarmi piujuaannartitsineq tunngavigalugu ineriartortitsinissaq pillugu angunigagai Nunatsinni ineriartornermi Naalakkersuisullu sulinerannut qanoq ilanngunneqarnissaannik Inatsisartut oqallinnissaannik siunnersuut

(Inuit Ataqatigiit Inatsisartunut ilaasortaatitai)

Naalagaaffiit Peqatigiit piujuaannartitsisumik ineriartornissamut anguniakkanik 17-iusunik 2030-p tungaanut anguniagassanik 2015-mi aalajangersagaqarpoq. Anguniakkat nunanit Naalagaaffipassuarniillu peqataaffigineqarput Nunattalu aamma anguniakkat tapersersorpai. Attassinissamut siuariartornissamullu pilersarusiami Naalakkersuisunit 2016-mi saqqummiunneqartumi Naalagaaffiit Peqatigiit piujuaannartitsisumik ineriartornissamut anguniagaat Nunatsinnit aamma atuutilernissaannik pilersarusiornissaq eqqaaneqarpoq. Suliap tamassuma ingerlannissaanut Inatsisartut oqallinnissaannik siunnersuut una siunertaqarpoq.

Naalagaaffiit Peqatigiit piujuaannartitsisumik ineriartornissamut anguniagaat 17-it immikkoortortani 169-usuni itisilerneqarput. Anguniakkat 17-iusut ukuupput:

- 1) Piitsuussuseq atorunnaarsinneqarli
- 2) Kaattoqarunnaarli
- 3) Peqqinnissaq atugarissaarnerlu
- 4) Ilinniagaqarneq pitsaasoq
- 5) Naligiissitaaneq
- 6) Imeq saligaatsoq eqqiluisaarnissamilu atortut
- 7) Nukissiuutit minguitsut mingutsitsisuunngitsullu
- 8) Suliaq naammaginarpoq kiisalu aningaasarsiornikku siuariartorneq
- 9) Suliffissuaqarneq, nutarterineq attaveqarnerlu
- 10) Assigiinngissuseq annikillisaruk
- 11) Illoqarfiit inuiaqatigiillu atajuarsinnaasut
- 12) Akisussaasumik atuneq tuniassiornerlu
- 13) Silap pissusaanut suliaq
- 14) Immami uumassusillit
- 15) Nunami uumassusillit
- 16) Eqqissineq, naapertuilluarneq kiisalu suliffeqarfiit qajannaatsut
- 17) Nunarsuarmi tamarmi peqatigiinnerit

Nunarsuaq tamakkerlugu anguniakkat pisortatigoortumik Naalagaaffiillu Peqatigiinnit akuerisaasumik CSR Greenland-mit kalaallisut nutserneqarsimapput, Naalagaaffiit Peqatigiinni oqaatsit pisortatigoortumik atorineqartut saniasigut oqaatsit allat siullersaannut ilaallutik.

INUIT ATAQATIGIIT

Inatsisartuni



Anguniakkat qulequtaasa nassuiarneqarneri siunnersuummut ilanngussami takuneqarsinnaapput.

Naalagaaffiit Peqatigiit piujuaannartitsisumik ineriartornermik anguniagaanni inuiaqatigiinni piujuaannartitsineq atajuarsinnaanerlu tunngaviuvoq. Avatangiisini pisuussutinillu atuinermi piujuaannartitsineq tamatumani ilaavoq, inuiaqatigiinnili aamma inuttut atukkat piujuaannartitsinermik tunngavissinnissaat anguniakkani tunngaviulluni.

Inuiaqatigiinni naligiinnerulernissaq, piitsuussutsip kaannerullu nungusarnissaannik anguniagaqarneq, ilinniartitaanikkullu siuarsaaneq, suliffeqarnikkullu patajaallisaaneq anguniakkatut Nunatsinnut pingaaruteqartorujussuupput. Naalagaaffiilli Peqatigiit anguniagai 17-t tamakkerlugit Nunatsinni ineriartortitsinermut inuiaqatigiinnullu attuumassuteqarput politikikkullu inuiaqatigiinni piujuaannartitsineq tunngavigalugu ineriartortitsinermut paaseqatigiiffiusussanik oqaasertalersussallugit pingaaruteqartoq Inuit Ataqatigiit isumaqarpugut.

CSR Greenland-p Naalagaaffiit Peqatigiit anguniagaanik pingaarnersiuinermi sammivinnut sisamanut agguataarinnessimapput, tassalu ilinniartitaaneq (anguniakkat 1, 4, 10 aamma 17), peqqissuseq (anguniakkat 3, 4 aamma 17), avatangiisit (anguniakkat 7, 11, 12, 13, 14 aamma 17) akisussaassuseqartumik pisiniartarneq (anguniakkat 9, 11, 16 aamma 17) iliuuseqaqataaffigissallugit tulleriarisimapput. CSR Greenland-p nunarsuaq tamakkerlugu anguniakkanut suliaqarsimanerat Inuit Ataqatigiit nersualaarusupparput CSR Greenland-illu Naalakkersuisunit suleqatigineqarluarnissaat kaammattuutigissavarput.

Nunarsuaq tamakkerlugu anguniakkanut iliuuseqarniarnermi naalakkersuinikkut inuiaqatigiinni suliniaqatigiiffinnik oqartussaasunillu allanik, inuussutissarsiornikkut sulialinnik aamma, suleqateqarneq nunani allani aamma takussaavoq. Assersuutigalugu danskit naalakkersuisuisa anguniakkanik piviusunngortitsinissamut pilersaarusiaani martsimi 2017-mi saqqummiunneqartumi inuiaqatigiinni susassaqtut akimorlugit suleqatigiinnikkut suliaqarnissaq pingaartinneqartutut oqaatigineqarpoq. Aamma svenskit naalakkersuisuisa anguniakkanik piviusunngortitsinissamut pilersaarusiaanni assersuutigalugu suliffeqarnermi susassaqtut kommunillu peqatigilluarlugit sulinissap pingaassusaa oqaatigineqarpoq.

Inuit Ataqatigiit isumaqarpugut Nunatsinni nunarsuaq tamakkerlugu anguniakkanik piviusunngortitsiniarnermi inuiaqatigiinni susassaqtut aamma peqatiginissaat pingaaruteqarluinnartoq. Kaammattuutigaarput Naalakkersuinikkut nunarsuaq tamakkerlugu piujuaannartitsineq tunngavigalugu ineriartortitsinissamut anguniakkanik Nunatsinni piviusunngortitsinissamut pilersaarsiornissaq.

Neriuppugut Naalagaaffiit Peqatigiit nunarsuaq tamakkerlugu piujuaannartitsinermik tunngavilimmik ineriartortitsinissamik anguniagaasa Nunatsinni qanoq iliuuseqarfiginissaannut Inatsisartut oqallinnissaat soqutigineqarluarumaartoq.

Oqallinnissamut isummallu assigiinngitsut tusarnissaannut qilanaarpugut.